



Komunikadu Imprensa
28 Feveireiru 2022
Parlamentu Nasionál

Komisaun A PN inklui hanoin balun JSMP nian iha Lei Kria Orden ba Advogadu Timor-Leste no aprova nia Estatutu: JSMP apresia aas tebes serbisu Komisaun A hodi finaliza lei ne'e

Komisaun A, Parlamentu Nasionál, iha 16-17 Feveireiru 2022 liuhusi diskusaun no votasaun iha especialidade iha Munisípiu Aileu, konsege finaliza ona Proposta Lei Nú.26/V(3^a) kona-ba Kria Orden ba Advogadu Timor-Leste no aprova nia Estatutu.

Estrutura Estatutu ne'e rasik kompostu husi artigu hamatuk 101 ne'ebé fahe ba Kapítulu IX. Kapítulu I ko'alia kona-ba Disposisaun Jerál, Kapítulu II kona-ba Organizaun OATL, Kapítulu III kona-ba Ezersísiu ba Advokasia, Kapítulu IV kona-ba Deontolojia Profesionál, Kapítulu V kona-ba Infrasaun no Sansaun Dixiplinár sira, Kapítulu VI kona-ba Rejime Patrimoniál, Kapítulu VII kona-ba Kooperasaun Internasionál, Kapítulu VIII kona-ba Advogadu no advogadu estajiáriu sira no Kapítulu IX kona-ba Disposisaun Finál.

“JSMP apresia ho serbisu Komisaun A hodi finaliza lei ne'e ho lalais tuir iha diskusaun no votasaun especialidade hodi apresenta ba Meza Parlamentu Nasionál atu bele halo votasaun iha finál globál. Lei ida ne'e alende bele fasilita advogadu sira iha ezerse knaar advokasia, lei ne'e mós haforsa sistema justisa iha asegura direitu ema hotu nian hodi asesu ba justisa formál,” dehan Diretora ezekutiva JSMP Ana Paula Marçal.

Lei Orden Advogadu ne'e sai mós nu'udar pakote ida husi lei sira reforma setór judisiáriu nian ne'ebé sai prioridade ba Governu Konstitusionál VIII no mós Parlamentu Nasionál iha lezislatura ida ne'e nian antes termina sira nia mandatu.

JSMP hein katak ho lei ida ne'e bele responde ba advogadu sira-nia preokupsaun no serbisu iha fó assistensia legál no advokasia ba nia kliente sira iha kazu penál no sivíl iha tribunál no mós atividade konsiliaun ka mediasaun sira entre parte interesadu sira tuir prosedimentu legál sira ne'ebé vigora iha Timor-Leste.

JSMP mós iha oportunidade ida ne'e, hakarak hato'o mós nia apresisaun ba Komisaun A, tanba bele inklui mós hanoin sira balun husi rekomendasun JSMP nian iha lei ne'e, rekomendasun hirak ne'e mak hanesan Artigu 88 kona-ba inskrisaun no ezersisíu advokasia iha Timor Leste husi advogadu estranjéiru ne'ebé prevee iha pontu 2 hodi inklui ka asosia ho advogadu nasional iha prátika no mós Artigu 89 kona-ba prátika okazional advogadu ho título profesionál orijen hodi akomoda mós advogadu sira ne'ebé la inskritu atu bele halo prátika advokasia bainhira hetan orientasaun husi Asosiasaun Advogadu Timor-Leste (OATL).

Esbosu Lei refere iha nia diskusaun no votasaun espesialidade envolve mós entidade relevante sira hanesan Tribunál, Ministériu Justisa, Minitériu Públiku, Defensória Públiku, representante Asosisaun Advogadu Timor-Leste (AATL) no mós advogadu privadu sira ne'ebé halo hela serbisu advokasia iha Timor-Leste.

Ikus JSMP rekomenda ba Prezidente Repúblika bele promulga ona Dekretu Parlamentu Nasionál Lei Nú.26/V(3^a) kona-ba Kria Orden ba Advogadu Timor-Leste no aprova nia Estatutu.

Atu hetan informasaun liutan favór kontaktu direktamente:

Ana Paula Marçal
Diretora Ezekutiva JSMP
Telefone: 3323883
www.jsmp.tl

Rua Beco Lakateu, Aldeia Manufuik,
SukuColmera, Administrativu Vera Cruz
Dili Timor Leste
PoBox: 275
Telefone: 3323883 | 77040735

www.jsmp.tl
ana@jsmp.tl

Facebook: www.facebook.com/timorleste.jsmp

Twitter: @JSMPtl